



QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum, die Martis
decimâ-quartâ Februarii.



M. ANTONIO DE SAINT-YON, Doctore,
Medico Regis ordinario, Præsidente.

An in Δυσουρία diureticis prævalet purgatio?

I.

QUÆ permiscuerat olim & confuderat obscura antiquitas
δυσουρία παθη: hæc eadem in tria genera posterior ætas
clariùs distinxit: His omnibus subest urinæ difficultas; Illa in
ιζουρία non redditur, in stranguriâ stillatim guttatimque emitti-
tetur; in *δυσουρία* modò guttatim modò affatim cum dolore &
cruciatu profluit. Hæc dispar vitiorum ratio similes dissimilescve
causas naeta invicem fermè convertitur, uniqué ut plurimùm
insedit vesicæ quæ est urinæ receptaculum. Quisquis Medicinam
his malis facere crebrâ alvi ductione tentaverit, eum, si artifex est,
spes rariùs frustrabitur: Illa siquidem utcunquè levabuntur; hoc
hercules, *δυσουρία* videlicet, tutiùs & celeriùs ad sanitatem per-
veniet: at varium adeò & mutabile res Medica, ut hîc proprias
perpetuasque medendi leges figere non ipsi Hippocrati Dii con-
cesserint; res enim, ætas, tempus, locus, habitus, usus semper
aliquid apportat novi, aliquid monet; ità ut illa quæ te scire
credas, nescias, & quæ tibi putaris prima, in experiundo repu-
dies: Quin incertam hanc conjecturalemquè artem, si postu-

2

las ratione certam facere; nihilo plus agas quàm si des operam ut cum ratione insanias. Jam morbus curationesque in notitiam faciliùs venient si vesica mali sedes (quatenùs scire curanti necessarium est) priùs in conspectum quendam adducatur.

I I.

VESICA uno quasi musculo circumvoluta duabus constat membranis; harum quæ extima valida est & densa; quæ intima utpote tenuis ac pluribus fibris per eam discurrentibus intertexta sensu pollet exquisitissimo. Vesicam innumera penetrant foramina invisibilia, extrinsecùs limphæ pervia; in his etiàm tria duntataxat majora conspiciuntur; quorum duo ad ejus cervicem posita urinam accipiunt descendentem à renibus per singulas venas colore albas *ὀυρηθῆρες* Græci vocant; tertium, quò patet urinæ exitus, à summâ cervice ad colem descendit. Cervicem carnosam magis & compressam conte- xunt fibræ transversæ & semiobliquæ; hanc alluunt & nutriunt arteriæ ab hypogastricâ, & venæ hypogastricæ sibi mutuò & arteriis conjunctæ; in hanc incurrunt spiritus per nervorum propagines à medullâ ossis sacri & ab octavo pari deductas; huic utrinque molliter incumbunt duæ glandulæ suprâ sphincterem positæ & arteriis, venis, nervis, canalibus aquosis seu lymphæ ductibus instructæ.

I I I.

IN loco tam arctis obnoxio itineribus hùcque & illùc flexis, tot inter vesicæ cervicis vasa, venas & arterias, fibras & nervos, carnes & glandulas, accensa vel mediocris inflammatio sæpè urinam reddi naturaliter prohibet. Illam quoque *ὀύρησιν δυσκολεῖν* faciunt & alunt tùm *ὀργῶντες* varii succi & acriores per vasa illic circumjecta undique delati; tùm latex serosus *salinis* & sulphureis permixtus particulis, & per tenuissimos renum tubulos percolatus. Quin etiam hoc vitium exasperatura videntur quæcunque nativas cruoris coagulationes dissolvendo,

aut strictiùs compingendo, copiosius serum in partes morbo infestatas protrudent; Quæquæ alienas sordes, aliisque destinate *Διαχόρηταις* illuc unà cum sero convehere apta sunt; Verùm ut nihil est tam capax fortuitorum quàm Medicina, quidni interdum contrà vertat, ut illa etiam, temeritati licet & inscitiae propiora, nonnunquam tamen respondeant; cùm & utique qui secundis aliquandò frustrà curatus est, contrariis sæpè restituatur: adeò ne patet breve confinium artis, & falsi!

I V.

HONESTUM purgationis nomen Medicina verbis magnifica imposuit fœdo cuidam stomachi ac intestinorum motui, quo fæces humorumque recrementa & corruptelæ foras *ἀνω καὶ κάτω* rejiciuntur. Ille excitatur vulgò medicamenti potestate, quâ laxatis aut vellicatis ventriculi intestinorumque fibris, modò vomitus, modò dejectiones frequentiores plenioresque sequuntur; hæc verò an solis mixti salibus, an intimæ partium texturæ, an toti demùm substantiæ sit referenda; certent otiosi *λόγων μεριμνηταί*; horum omnium rationes non equidem cogunt, fortè nec persuadent, sed inopiâ veri, & errantium credentiumque consensu possunt more sceptico videri non improbabiles. Cum hætenùs multa veterum medendi duritiæ melius & lætiùs mutata sint, & cùm plura consilio quam vi perficiantur in regendis corporum valetudinibus; timidus procellæ, illud ama medicamentum quod ventrem molliat & blandiùs ducat; ità tutus eris extrà metum & periculum sanitatem moliendo; nec non securiùs peraget lenis & tranquilla Medicinæ potestas, quod acrior & valentior ferè in pejus concitaret & converteret. Sed scire licet catharsim quamcumque non mereri præmium inculpatæ tutelæ; ejus enim levem culpam (propè dixerim latam & dolum malum) arguunt arcanus stomachi horror nauseaquè insuperabilis, stercoris & excretorum fœtor horridus, corporis languor & dolor, sitisque superveniens, &c.

IN hâc ipsâ re igitur, ut in cæteris, nihil est ex omni parte beatum; medio de fonte salutiferæ artis surgit amari aliquid quod causariis ac fluidis hominum corpusculis insolens in novum ducit vitium; hoc tamen utpotè levius, tolerabile est, nec adeò pertimescendum; huic, Natura suo juri relicta protinus medicabitur: lædat ergò stomachum purgatio, torqueat intestina, solvat viscera, partium fermenta vitiet, humores corrumpat, totum denique corpus affligat, sunt huic nihilominus suæ dotes & præmia; hæc, prius τὸ σώματος ἀναρριζόμενου, ad intestina transferet succos qui vesicæ partes contactu & valetudine molestius inficiebant. Tinctura nimirum cathartica in ventriculo ac intestinis paulisper commorata, & ἐνεργικῶς quoquo versum diffusa venis, impuritates ab alimentis & degenerere chylo ortas, promiscuè & finè delectu ex totis corporibus visceribusquè secretas &eductas per alvum feliciter excernet; eo ferè modo demptâ atroci morbo materiâ, levatisque eo vèlutî onere vesicæ partibus, & morbus in suo impetu mollietur, & qui modò in malis erat æger, mōx fiet ὑψηπικώτατος.

Ergo in Δυσσχίᾳ diureticis prævalet purgatio.

Domini Doctores disputaturi.

M. Ludovicus Labbé, Academiæ Censor.

M. Andreas Enguehard, Professor Regius.

M. Josephus Thomasseau.

M. Ludovicus Poirier.

M. Petrus Bourdelot, Medicus Regis perpetuò ordinarius.

M. Joannes Baptista-Renatus Moreau, Professor Regius.

M. Matthæus Thuillier.

M. Carolus Marteau,

M. Antonius le Moine.

Proponēbat Parisiis CAROLUS THUILLIER, Aurelius,
Baccalaureus Medicus. A. R. S. H. 1696.

Apud Franciscum Muguet, Regis & Facultatis Medicinæ Typographum.